

那文毅公奏議

鄂文毅公二任直隸總督奏議卷六十八目錄

卷六十八

訓練武備

附酌定修製器械章程

疏通駐防旗兵

整飭邊戍限期

賑濟兵需

議設多倫諾爾廳學校

籌備新疆兵差

那文毅公二任直隸總督奏議卷六十八

直隸總督奏議

男容安恭輯

訓練武備

附酌定修製器械章程

道光五年十二月十九日

奏爲直省營伍需人請

旨勅調陝甘將備數員俾資整飭事竊照直隸爲畿輔

重地營伍最關緊要臣前在京時仰蒙

特示周詳諭令實心整飭跪聆之下刻切籌思抵任後

卽查閱督標營伍雖官兵技藝向亦隨時操演而

一律未備訓練未精正須上緊講求方可日有起

至於兵丁所用器械鎗則火門鎗口寬大出子  
無力而不正弓多欹凸雖不在挽強而拉弓撒放  
亦均欠工夫其餘軍械亦多損壞缺經前督臣  
蔣攸銛屢飭修整而一切尙欠講究臣現已設法  
籌款分別添製補修並連日督飭中軍副將等議  
設速戰陣隊挑選精健弁兵配以鎗箭長矛並擡  
礮臺鎗合成一隊一俟挑配完備器械齊全開春  
卽可趕緊督操按臣教演併已通行各提鎮營亦  
俱仿照章程一體挑備實力勤操斷不容稍事因  
循上勞

宸厯惟是直隸各營員弁向由部中推選者居多其間固不乏可用之材第此等員弁類皆論俸掣推則資格較深年力已不無衰老其餘別項人員亦賢否不齊一時驟難期其奏效因查陝甘將備向多久歷戎行之員且臣在彼數任其平日之操兵辦事亦已素所深知是以臣在京時曾經籲懇揀調數員業已仰蒙

恩允茲特不揣冒昧開具清單向求

皇上俯念直省營伍乏人准其飭調前來俾資整頓將  
次遇有相當缺出卽由臣酌量奏請補用其該處

所遺員缺卽請

勅下署督臣楊遇春揀選妥員另行請補如此通融籌辦在陝甘尙不致乏人而直省得有得力之員庶於營伍獲有裨益謹

奏

甘肅大靖營遊擊興安保

陝西白土營遊擊馬明

陝西延綏鎮標中營遊擊張作功

陝西涇州營都司萬祥

陝西寧陝營守備向榮

奉

硃批直隸爲畿輔重地此係因時創行各直省不得援以爲例另有諭旨

道光五年十二月二十四日奉

上諭那彥成奏直隸營伍需人請調陝甘將備以資整飭一摺直隸各營員由部推選者居多不盡得力自應亟籌整頓惟揀調過多轉致無缺可補所有甘肅大靖營遊擊興安保陝西白土營遊擊馬明涇州營都司萬祥俱著准其飭調直隸差遣遇有相當缺出由該督酌量奏補該省所遺員缺著該署督揀選妥

員另行請補直隸爲畿輔重地此係因時創行各直  
省不得援以爲例至該督自甘肅來京陛見時所帶  
千總以下等弁俱著飭令回營歸伍該部知道

道光五年十二月十九日

奏爲酌定各營請修器械章程以昭覈實而杜弊端  
事竊照各營額設軍械原係武備要需如遇動缺  
損壞例應查覈年限隨時請修以備應用臣現在  
查驗督標器械大半不能適用本應查明承辦之  
員予以叅處第念官非一任事閱多年是以業經  
籌款分別添製補修俾資教演但查各營請修軍



械在所時有向由藩司覈准詳報總督分別銀數  
照例奏咨其所需工料銀兩候准部覆卽由該營  
員具領回營自行製造工竣造冊報銷厯經辦理  
在案惟是此項銀數動輒盈千約計每歲所需開  
銷不下數萬若竟任聽營員徑領回營其究竟曾  
否修製以及修製是否如式僅據空文具報已屬  
無所考稽更恐不肖營員視無稽查藉爲彌縫別  
項虧挪之計營伍旣須整飭錢糧尤應覈實節省  
期無弊混查軍械一項武備攸關如果合例應修  
固不能不准其查辦第所需物料工匠惟省城齊

備精良其餘營縣地方或地處偏僻諸料難得齊  
備臣熟加籌酌嗣後凡遇此等請修之案一切仍  
照例覈辦惟估需銀款無論多寡統俟奏咨覆准  
後飭知該營一面赴司具領一面卽呈報臣衙門  
派委妥員會同該營員就近在省如式監製工竣  
將所製器械造送冊結由臣親加點驗如皆合用  
再令領回倘稍有偷減卽予叅辦仍責令照數賠  
修似此嚴立章程不特各營軍械咸歸實用且  
帑項亦不致虛糜以杜不肖營員借端擅冒等弊仍  
通飭各營遵照並行藩司立案如蒙

聖明允可並請

勅下各直省一體照辦庶工歸實在營伍可期實用似

亦不無裨益謹

奏

道光五年十二月二十四日奉

上諭那彥成奏酌定各營修製器械章程一摺各營額設器械例應查覈年限隨時修補以昭軍實據該督查明直隸各營請修軍械覈明銀數分別奏咨俟准部覆後由該營員具領回營自行製造僅據空文詳報恐不免有彌縫虧挪情弊嗣後凡遇此等請修各

案所估銀數統俟奏咨覆准一面飭知該營赴司具領一面呈報該督派委委員會同該營員就近在省如式監製由該督親加點驗倘有偷減情弊卽行叅辦著賠以杜捏冒而嚴武備

道光六年正月二十八日

奏爲謹將辦理直隸地方營伍情形恭摺奏

聞事竊

臣猥以庸愚忝膺

委任刻切冰兢自抵任以來除辦理地方公事而外卽以營伍事宜時時籌畫設法整頓前因員弁驟難得力器械亦欠講求曾經奏請揀調陝甘將備數

員來直襄辦業蒙

恩允欽感殊深伏思操練弁兵非徒樹厥聲威要在求  
諸實用鎗箭以準頭爲主刀矛以便捷爲先而其  
間進退聯絡尤須平時配成陣隊訓練純熟遇有  
調遣方爲有制之師臣昨將督標應需一切器械  
籌款添製現已將次齊全隨以所設速戰陣式挑  
就馬步守精健兵丁分配鎗箭長矛間以擡鎗擡  
礮排合成隊專意督操並將議定章程通行各提  
鎮營令其各就各營情形不必拘定成式斟酌辦  
理務期實在得力近據各提鎮陸續具報均已仿

照演練

臣

擬不時調考或明察暗訪不容稍有懈

怠嗣後凡有各營員弁缺出當令該處選擬人員  
送至督標考較督標有缺亦飭取各營員弁考較  
何人技藝優長卽予拔取懲劣拔優務使彼此觀  
摩共資振奮卽此時各營路將備員弁臣到任未  
久難以周悉現亦陸續分班調省考驗如有年衰  
技劣之員卽當隨時甄劾以肅戎行臣受

恩深重操之不得不嚴人皆苦於約束則嫌怨必多然  
理出於正心得其安仰仗

聖明信任怨誹亦所不避要使將備兵丁咸知振作庶

幾

帑不虛糜兵歸實用謹

奏奉

硃批所奏均悉

道光六年二月十九日

奏爲大名鎮存城兵少不敷備戰請裁撤海口官兵  
以符舊制而重操防事竊查大名府屬七州縣地  
方遠在直省東南延袤三百里挿入豫東兩省之  
間左界曹州右界衛輝習俗素稱强悍且壤地三  
省相連盜賊往來避匿緝捕尤爲不易前因豫省

有河北鎮總兵東省有曹州鎮總兵大名界在其  
中止有副將一員聲勢不能連絡經前督臣方受  
疇奏准添設總兵及都守等官並抽撥兵九百八  
十七名分布各處揆之形勢洵爲至當惟辦理未  
能切要徒有其名未得實濟茲查大名一鎮界統  
順廣大三府營汛較多地方遼濶實爲各鎮所無  
雖名有三千八九百兵而分布三府地方汛路之  
外存城之兵無幾今大名鎮左右兩營存城兵共  
止一千名本營各有應辦公事除去字識匠藝及  
差遣站役等項實在操練之兵不能得有五六百



名難以配成隊伍設有調遣臨時甫向各路汎傳  
集則勢同烏合仍屬不能得力是徒有一鎮兵馬  
錢糧之費不能收一鎮精練操兵之用此時若在  
直省綠營籌畫各提鎮標內均有定額實無可以  
抽撥之兵臣公同在省司道及正定天津大名三  
鎮再四籌度必須於不甚得力營分裁撤歸併俾  
得操成隊伍方不至有名無實查天津舊有水師  
係於乾隆年間因海口無事議裁嘉慶二十一年  
間復設兵一千名固爲慎重海防其實該處名爲  
海口實係腹地與江浙閩廣情形迥然不同且海

口以外數十里有攔港沙一道儼若海河外衛洋船駛至此處非熟習海徑者不能進口洋面晏安無所用其防範此項水師竟屬虛設於添設大名鎮總兵案內經前督臣方受疇奏裁水師總兵一員官兵五百名歸併大名改協爲鎮現在海口尙存水師叅將一員守備二員千總二員把總三員經制外委三員額外外委六員馬步守兵四百九十一名臣伏思設立營制尋常無事之日各項差役旣分不能各兵俱能操練遇有事之時營中各項事務更多亦不盡人人可以出隊是兵多方可

分派兵少卽不能濟事今海口所設兵止五百有事不能得力况實在無事則此項虛設官兵徒糜俸餉且水師所用船隻蓬索修船等項每歲費至六千餘兩與其多糜

帑金養此無用之兵莫若仍復乾隆年間舊制全行裁汰將水師叅將改作大名鎮中營遊擊其水師守備千把及外委馬步守兵五百名並於大名鎮所轄廣順兩府事簡營汛內抽撥兵二百名共成七百名歸中營遊擊管理與左右兩營舊有兵一千名共成一千七百名由該鎮督率操練除去字

識及各項差使外可得一千三四百人不派礮差  
專意操練可成一隊勁旅撤無益之兵併之有用  
之地錢糧亦大可節省且於三省扼要地方亦足  
以壯聲威而資鎮壓如蒙

俞允所有一切裁撤添設事宜容臣詳議章程照例具  
題辦理謹

奏

道光六年二月十九日奉

上諭那彥成奏大名鎮存城兵少請裁撤海口官兵一  
摺直隸大名府屬界連豫東二省地居扼要前經添

設總兵都守等官並抽撥兵丁分布彈壓惟存城之  
兵尙少不足以資操防至天津地方名爲海口實係  
腹地且洋面久經肅清所有現存水師營官兵歲糜  
帑金無裨實用著照所請准將天津水師營裁撤改  
歸大名鎮以成勁旅惟水師官兵素習海洋不能改  
充陸路且相距遙遠其應如何分別裁撥添設及一  
切事宜著該督詳查妥議俟奏到時再降諭旨

道光七年正月初四日

奏爲原撥水師營津貼公項恭摺

天恩俯准改撥陸路各營以資辦公事竊照天津海口

水師前因海口無須防範經臣請復乾隆年間舊制全行裁撤添改大名中營官兵七百餘員名以資控制奏蒙

允准當將應添應裁事宜臚列條款會議具

題內有原撥水師營天津縣掛甲寺官莊地畝每年所收租銀一千二十餘兩租糧自數十石至百餘石不等除完賦外餘給各兵食用又原撥水師營各項公用鹽飭加價項下運庫生息裁剩銀二千五百六十餘兩議請將前項地租留歸天津鎮經管分給葛沽海口并所轄運河各營汛作爲催漕

緝私并看守礮臺弁兵津貼之用運庫生息銀兩  
分撥正定鎮銀一千兩河間開州兩協各三百兩  
順德廣平磁州東明杜勝長垣等六營各一百兩  
宣化鎮銀三千六十餘兩並請將正定鎮所收十  
八年教匪滋事案內叛產地租銀四百七十餘兩  
改歸大名鎮就近取租分別辦公接准部議以水  
師營官兵既經裁撤所有掛甲寺地租應循舊案  
歸天津縣徵解內務府兌收運庫生息銀兩仍存  
運庫報撥均未便留營動用支銷並叛產地租亦  
未便改撥等因題覆奉

旨依議欽此欽遵咨會到臣伏查直隸爲

畿輔重地營制首宜整肅臣仰荷

聖恩重蒞以來認真訓練每於校閱技藝旗幟尙屬鮮明而執操鎗矛弓箭類多不適於用推原其故緣各營經費不敷歷久相沿未能隨時修理而製造軍械例有年限又未便違例請修卽如鳥鎗一項定例四十年造二十年修若時常演放之具不及年餘火門堂口卽須修理斷不能待至年限始行分別修造其餘刀鎗藤牌弓箭撒袋衣鞍等項但經操演使用卽易損壞查各營原設公費爲數無



多向有一定支銷斷不敷隨時修補軍械之用因查掛甲寺地租係從前水師旗營官置之產乾隆年間裁汰改歸徵解內務府嘉慶二十二年添設綠營水師鎮總兵復經

奏准歸營管理其運庫生息原撥每年銀六千兩原不僅止津貼巡洋弁兵口糧一項嗣因改鎮爲營裁剩銀二千五百六十餘兩一係地租一係息銀均非正項錢糧原營亦係改撥兵數並無裁撤是添設修理經費以津貼水師之銀改爲津貼陸路挹彼注此仍屬以公濟公從此歲有支銷一切軍

械藉資修整利用洵與營伍大有裨益似應仍照  
原議將前項地租息銀改撥各鎮協營分別動支  
仍覈實造冊報部覆銷以杜浮冒第係奉部議駁  
之項飭據藩司層之申議詳請奏前來合無仰懇  
天恩將原撥掛甲寺地租并水師營通庫生息二款  
俯如臣原議賞給各營支領其正定鎮所收叛產銀兩  
改歸大名鎮就近取租應用俟奉有

諭旨後再行分飭遵照謹

奏

道光七年正月初六日奉

上諭那彥成奏原撥水師營津貼公項懇請改撥陸路  
各營一摺前因裁撤天津海口水師添改大名中營  
官兵七百餘員名該督請將原撥水師營津貼公項  
改撥陸路各營經戶部議以地租應歸內務府兌收  
生息銀兩仍存運庫報撥未便留營動用支銷其叛  
產地畝亦未便改撥茲據該督奏陸路各營原設經  
費實不敷用前將天津水師營改歸陸路兵數並無  
裁撤原撥水師營地租生息銀兩均非正項錢糧改  
爲津貼陸路仍屬以公濟公查直隸營務需用較繁  
著照所請所有原撥水師營天津縣掛甲寺官莊地

畝所收租銀一千二十餘兩租糧自數十石至百餘石不等除完賦外餘給各兵食用其地租留歸天津鎮經管分給葛沽海口并所轄運河各營汛作爲催漕緝私並看守礮臺弁兵津貼之用原撥鹽勛加價項下運庫生息裁剩銀二千五百六十餘兩分撥正定鎮銀一千兩河間開州兩協銀各三百兩順德廣平磁州東明杜勝長垣等六營銀各一百兩宣化鎮銀三百六十餘兩並將正定鎮所收叛產地租銀四百七十餘兩改歸大名鎮就近取租分別辦公各鎮協營有此津貼之後該督更當督飭查察隨時修整

軍械務須堅利適用每年動支銀數仍覈實造冊報部查覈毋得稍滋浮冒致干叅辦該部知道

道光七年四月二十九日

奏爲新添大名中營兵丁馬匹軍械等項齊全按期操演委員驗明據實奏

聞事竊查大名地方界連豫東五方襍處素稱扼要前經臣奏明將天津鎮水師營裁撤添設大名中營遊擊等官以成一隊勁旅并請將正定鎮所收叛產地租銀兩改歸大名鎮就近取租以爲津貼辦公之用仰蒙

俞允茲據大名鎮總兵薛陞具稟新募兵丁齊全操演  
合度馬匹買補足額軍械一律修整稟請委員點  
驗查正定鎮總兵舒通阿辦事認真在直年久熟  
悉營務當卽飭令就近馳往點驗旋據稟稱看得  
該鎮弁兵合操大陣並速戰陣式尙屬聯絡兵丁  
均爲強壯買補馬匹俱臚壯足額並無缺乏不足  
之處一切軍裝器械並解到水師營裁撥軍械亦  
堪適用等情稟覆前來臣查營伍首重操練兵丁  
旣須精壯器械亦須勁利適用方不虛糜今歲查  
閱營伍已奉

旨派

臣

校閱統俟秋間

臣

親赴大名再行認真考校點

驗謹

奏奉

硃批知道了

道光六年十一月初七日

奏爲查閱省標營伍情形恭摺具奏事竊查直隸爲

畿輔重地武備尤不容稍弛

臣

於去冬到任後節

次通飭各營員弁按期認真操演隨時澄汰獎拔

務使將能有勇知方兵能克敵致果復於各官調

考時嚴加甄別俾知警懼茲當冬令考校之候飭

殊

調本標前後左右四營并保定城守等營各官兵  
齊集教場於十月二十二二十二十三等日逐一  
校閱各弁兵配隊演陣步代整齊施放連環鎗礮  
一氣聯絡每兵十名射五十矢打三十鎗中靶在  
六七成以上內中全中靶者甚多官弁馬兵騎射  
亦漸可觀步箭弓力六力八力不等其藤牌小陣  
一力填為未免均係綠營虛冒朕早惡其不實  
爬演雲梯扎杆對刀及馬上各樣技俱仿照臨陣  
也創如東三省之長於騎射者經朕目睹者不  
對敵時連環攻擊可收實用不徒以花樣飾觀器  
少亦未見用十二力弓者  
械業均修製堅利馬匹亦皆臙壯 臣當場逐一秉  
公衡量擇其技藝嫻熟者量加獎賞并分別記名



拔補間有技藝稍生者亦分別責降勒習以示勸懲臣於校閱事畢復嚴飭各將備隨時督率訓練務期一律精熟咸成勁旅以仰副

聖主修明武備之至意謹

奏

道光六年十一月十二日奉

上諭本日那彥成奏查閱省標營伍據稱馬兵騎射可觀步箭弓六力八力不等所奏尙爲覈實近來各省奏到閱伍情形多填寫十力十二力弓均不免綠營虛習朕早覺其不實如東三省官兵挽強命中者不

少經朕目睹未見有開十二力弓步射者卽間或有之亦不過百中之一二豈能比比皆然嗣後各省將軍都統督撫提鎮等隨時督率訓練務期精熟咸成勁旅至弓力不拘六七八力總以中多爲上自能一律嫻熟不在浮報弓力轉致有名無實也將此通諭知之

道光七年九月十四日

奏爲校閱宣化府及古北口營伍恭摺具奏事竊

臣

於前月二十三日

陛辭後卽由京前赴宣化并預期劄調張家口獨石口

兩處官兵就近前赴宣郡嗣臣行抵宣化遂一併  
閱看演陣式甚爲便捷連環鎗礮聲勢齊整藤牌  
及長矛各技及各官弁并馬步官兵馬步箭俱不  
軟弱準頭十得六七擡鎗三十杆亦施放得法臣  
又飭令再加添製二十杆一體演習以宣化營與  
省城督標比較雖似稍遜而各項技藝是時常練  
習均有實在工夫器械尙皆鮮明兵丁內並無衰  
弱之人該鎮海凌阿督率所屬將官實爲訓練有  
方已當場分別獎賞可列爲一等臣閱竣卽由宣  
化馳赴古北口悉心校閱大陣隊伍尙爲嚴肅連

環鎗礮均手尾相應藤牌及各技亦有可觀馬步  
箭開八力十力者不少惟準頭不能一律命中烏  
鎗似爲較勝長矛馬鎗尙欠精熟當卽嚴飭各官  
勤加教演務至精純其技藝優嫻者仍加以獎賞  
該處營伍可列二等查宣化府及古北口兩處地  
近邊口操防尤關緊要閱視不能不稍爲從嚴方  
可望營制漸有起色臣於兩處閱畢後嚴諭各將  
弁勿得以業已閱過稍生懈弛上緊不時操演仍  
將存記各官兵註冊以備指名調考務期精益求精  
悉成勁旅以仰副

皇上武備修明之至意謹

奏奉

硃批知道了

道光七年十月初三日

奏爲校閱泰寧鎮屬營伍情形事竊

臣前赴易州查

閱泰寧鎮營伍經鎮

臣武忠額將各營官兵如期

調集

臣卽將鎮屬左右二營並紫荆易州涑水等

營將弁逐加考驗演陣甚爲齊整各官弁并馬步

兵丁年力精壯藝勇可觀者十之六七其餘亦皆

去得隨將各營兵丁分配隊伍演習進退步伐均

屬整齊施放連環鎗礮聲勢聯絡鎗箭中靶及騎射長矛亦爲合式兵丁內並無軟弱充數之人該鎮武忠額平日督率訓練洵屬認真堪列二等已將技藝嫺熟將備弁兵當場獎賞其兵丁內稍有生疎遲鈍者分別責懲查該鎮係

陵寢重地守衛操防尤應嚴肅臣復諄切嚴飭將備等隨時勒加訓練勿以業經校閱稍生疎懈仍將存記各官兵註冊以備指名調考俾技藝益臻嫺熟以仰副

皇上整飭戎行之至意謹

奏奉

硃批知道了

道光七年十月二十日

奏爲查閱省標營伍情形事竊查直隸爲畿輔重地  
武備尤不容稍弛

臣仰蒙

皇上天恩畀以畿輔重任訓武練兵最關緊要兩年以  
來節經督飭所屬各營員弁按期認真操演隨時  
澄汰獎拔復於各官調考時嚴加甄別俾知警懼  
茲當冬令考校之候又值輪閱營伍之年飭調本  
標前後左右四營并保定城守等營各官兵齊集

教塲於十月初十至十四等日逐一校閱各弁兵大陣及速戰陣配隊演陣步伐整齊施放連環鎗礮一氣聯絡每兵十名射五十矢中靶在六七成以上鎗兵十名竟致無甚空鎗約在九成上下弓箭一項因各兵極力向上人各奮發私下不免射多轉致出病鎗則日熟一日打一鎗有一鎗之益好不致貪中靶生病至官弁馬射向有綠營習氣

臣

親自指教近亦改至五六成有餘其餘藤牌小陣爬演雲梯扎杆對刀等技俱能大有長進器械業均經臣親視修製堅利馬匹亦皆臚壯以營制整



齊技藝純熟而論可列爲一等臣當場逐一秉公  
衡量嚴加考校其最爲嫻熟者量加獎賞并分別  
記名拔補間有技藝畧生者亦以相形之下各知  
愧奮相觀而善較上司督催爲更得力此後持之  
以恒無怠無荒洵可咸成勁旅庶可仰副  
聖主修明武備之至意謹

奏

硃批所奏均悉實力爲之

道光九年十一月十六日

奏爲查閱省標營伍情形恭摺奏

聞事竊查直隸爲畿輔重地武備尤宜嚴整臣仰蒙

皇上天恩畀以畿圻重任節經督飭所屬各營員弁按期認真操演隨時澄汰獎拔復於各官調考時嚴加甄別俾知儆懼茲當冬令考核之候飭調本標前後左右四營並保定城守等營各官兵齊集教場於十一月初四日至初八等日遂一校閱各弁兵大陣及速戰陣配隊演陣步伐整齊施放連環鎗礮一氣聯絡馬步箭中靶約在八成以上鎗兵打靶約在九成上下擡礮擡鎗約在九成以上其餘藤牌小陣爬演雲梯扎杆對刀俱能趨捷強健

大有長進器械均經修製堅利馬匹悉皆應壯以  
營制齊整技藝純熟而論可列爲一等臣當場逐  
一校量擇其最爲嫻熟者量加獎賞并分別記名  
拔補間有技藝未純者亦分別責處以示勸懲督  
標如此方可表式各提鎮俾知愧奮相觀而善此  
後持之以恒無怠無荒直隸一省之兵可期得力  
兼可震懾地方有備無患以仰副

聖主修明武備之至意謹

奏奉

硃批知道了

道光十年十月十四日

奏爲查閱省標營伍情形事竊查直隸爲畿輔重地

武備尤宜嚴整

臣仰蒙

皇上天恩畀以畿圻重任節經督飭所屬各營員弁按期認真操演隨時澄汰獎拔復於各官調考時嚴加甄別俾知儆懼茲當冬令考校之候飭調本標前後左右四營並保定城守營各官兵齊集教場於十月初六七八等日逐一校閱各弁兵大陣及連戰陣配隊演陣步伐整齊施放連環鎗礮一氣聯絡馬步箭中靶約在八成以上餘兵打靶約在

九成以上擡礮撞鎗均在八成以上其餘藤牌小陣爬演雲梯扎杆對刀俱能趨捷強健較之上年較閱時更有長進器械亦復修製堅利馬匹悉皆臚壯以營制齊整技藝習熟而論可列爲一等臣當場逐一較量擇其最爲嫻熟者量加獎賞並分別記名拔補間有技藝少次者雖不予以青處亦知愧勵督標如此方可表率各提鎮俾知矜式可期相觀而善此後持之以恒無怠無荒直隸一省之兵可期得力兼可震懾地方有備無患以仰副聖主修明武備之至意謹

奏奉

硃批知道了

䟽通駐防旗兵

道光六年十月二十四日

奏爲駐防滿洲請挑補綠營兵弁藉䟽通而廣登進  
恭摺具奏事竊照各省駐防滿洲旗人蒙

本朝養育深恩厯年幾二百載生齒日繁間散人丁  
日衆錢糧旣有定額謀生又無資本窘迫情形亟  
應調劑我

皇上軫念八旗生計節次

俯允廷臣之請凡有益於在京旗人者無不次第舉行  
恩施稠疊有加無已惟各直省駐防尙未議及䟽通之

法臣愚以爲在京八旗例准挑用提督衙門兵丁各省駐防因兵有定額閒散過多生計維艱似亦可以仿照京營辦理卽在附近各標綠營內挑補兵丁惟係旗人自應少示區別請於有缺之時校閱馬步鎗箭優者卽行補給馬糧一分隨營操演如果弓馬嫻熟人材出衆遇有外委千把等缺依次與綠營兵弁一體考拔如此量爲變通在額定兵餉並無增益而駐防閒散得有出身之階均可及時報効似屬有裨謹

奏



道光六年十月二十九日奉

上諭那彥成奏駐防滿洲請挑補綠營兵弁一摺著兵部覆議具奏

容安謹按此奏經兵部議准得

旨允行

道光七年正月十五日

奏爲遵

旨會議覆奏事竊臣接准兵部咨開欽奉

上諭兵部議復那彥成奏請將駐防滿洲閒散仿照巡捕營之例挑補綠營兵弁一摺各省駐防閒散毋論

滿洲蒙古漢軍俱准其入綠營挑補馬兵洵可藉疏通而資造就惟定例之始必須酌予限制著於該駐防同城及附近營分遇有馬兵開革事故與該營戰守兵一體校閱技藝挑補不得過本營十分之二毋庸與通省兵額合計至考拔弁缺惟當以弓馬勞績爲定不必復行區別其由旗咨送時祇准將年壯閒散情願赴挑者驗送不得有強派勒捐情弊挑入綠營之後所有訓練約束及陞轉降革各事宜均由該管將弁照綠營章程一體辦理如有滋事干涉地方者亦照綠營例交地方官懲辦如該駐防同城及附

近標營分馬兵額缺較少該間散愿挑戰兵守兵者亦准送挑俱不得過十分之二仍著駐防省分各督撫會同將軍都統副都統妥議章程奏咨以期經久

欽此欽遵咨會到

臣

伏查直隸駐防二十五處坐

落實抵滄州東安采育保定固安雄縣良鄉霸州山海關永平遷安喜峯口羅文峪密雲古北口三河玉田順義昌平察哈爾張家口獨石口千家店熱河等處地方糧甲多寡既有不齊附近標營亦遠近不等若就各處同城綠營挑補在保定駐防與督標同城古北口駐防與提標同城原屬尙易

如一州一縣地方綠營汛兵不過數十名待其開  
草事故始准挑取未免曠日持久雖有疏通之名  
仍無調劑之實自應酌定章程方可永遠遵守嗣  
後駐防閒散應請先儘該駐防同城挑補如同城  
並無缺出或已挑足二成准其儘同標統轄之附  
近營汛挑取該駐防將軍都統防守尉等查明本  
旗年壯閒散情願赴挑者先行造冊咨送統轄之  
鎮協分別飭知所屬附近駐防及與駐防同城之  
營汛屆期挑取惟既准挑入附近標營則離家較  
遠勢難兼顧家屬應准隨同前往報明本旗立案

倘有事故開革准仍歸本旗入檔如不願攜帶家屬同往者仍聽其便至兵丁例有紅白賞銀該閒散既已挑入綠營應在綠營照該營之例支領其戶口雖隸綠營每屆年終應仍由鎮協咨照駐防營以備查考又查各省營制馬兵額缺不及戰兵守兵之半既准一體挑充戰兵守兵其挑取馬兵不得過本營馬兵十分之二挑取戰兵守兵亦不得過本營戰兵守兵十分之二如此酌定章程庶足以示疏通而照限制嗣後再有未盡事宜均徑行咨部辦理爲此會同署直隸提督

臣

海凌阿熱

河都統

臣

昇寅察哈爾都統

臣

博啟圖密雲副都

統

臣

興住山海關副都統

臣

存華恭摺覆奏伏乞

皇上勅部覆施行謹

奏奉

硃批兵部議奏

道光十年三月十五日

奏爲酌議駐防閒散挑補綠營兵丁奉行不力另擬

章程以廣疏通事竊照各省駐防生齒日繁

臣

於

道光六年間曾經議請照京營挑用兵丁之例將

閒散之人准於就近綠營挑補兵丁奏奉

諭旨飭部覈議嗣經兵部議奏欽奉

上諭各省駐防閒散無論滿洲蒙古漢軍俱准其入綠  
營挑補馬兵洵可藉疏通而資造就惟定例之始必  
須准予限制著於該駐防同城及附近營分遇有馬  
兵開革事故該營戰守兵一體校閱技藝挑補不得  
過本營十分之二毋庸與通省兵額合計如該駐防  
同城及附近標營分馬兵額缺較少該閒散有願挑  
戰兵守兵者亦准挑送俱不得過十分之二欽此欽  
遵在案伏查旗民原屬一體同在

生成養之中莫非我

國家赤子所以請將駐防閒散挑入綠營者亦爲調劑疏通教養人才起見乃自奏定以來綠營未免瞻徇固執各存私見奉行不力不願駐防閒散挑補多有藉口駐防不願赴挑卽如直隸一省營分最大駐防最多自<sub>臣</sub>奉

命赴西口離任一載有餘而省標挑補駐防僅二三人其餘提鎮各標營亦屬無幾豈無開革事故之缺何致挑補寥寥<sub>臣</sub>於去年回任後督飭<sub>臣</sub>標將弁認真挑拔現已補用十餘人而弓馬人材均堪造就細詢其何以未經挑補僉稱並非該兵丁等不



願實係綠營未經行取臣以各旗人技藝才具並不遜於漢兵此等可用之材焉知異日不爲干城之選豈可任其終身閒棄况駐防生計近日頗形竭蹶今蒙

皇上體卹深恩予以疏通之路俾有登進之階無不鼓舞歡欣急圖自立若聽各營隨意挑取並不明定章程則用舍操自綠營卽再遲數年亦不能挑補足額是有調劑之名而無調劑之實摸稜因循於該駐防生計仍屬無裨臣悉心酌議應請

旨再行通飭各省遵照部定章程綠營馬兵內挑補二

成四缺挑一之例改爲二缺挑一仍不得過二成  
至駐防閒散挑用足數之後卽作爲旗額遇有旗  
兵開革事故仍以駐防閒散挑補不得改補漢兵  
如附近標營馬兵額缺較少卽以戰守兵挑用均  
以二成爲率於調劑旗人生計旣速又不多佔漢  
缺似屬兩便此後考拔弁缺仍與漢兵一體校拔  
只以弓馬勞績爲定不必復行區別於每歲歲終  
將共挑若干由督撫提臣及附近駐防營分總兵  
專摺奏明有不如例少挑者卽將該管營員聲請  
議處如此明定章程庶旗民各有定額而綠營亦

無膽狗阻滯之弊矣謹

奏奉

硃批兵部議奏

容安謹案此奏准兵部議駁得

旨依議

整飭邊戌限期

道光七年十月十一日

奏爲換防班滿告留之弁兵應飭令回營當差以符  
營制事據宣化鎮總兵海凌阿稟稱竊查烏里雅  
蘇台科布多換防官兵向係由該鎮標派往大班  
係五年十年更換一次小班係三年八年更換一  
次查大班應派叅遊一員守備一員千總一員把  
總六員經制外委一員馬步兵三百六十二名小  
班應派千總一員把總二員馬步兵五十八名兩  
班共應派叅遊一員守備一員千總二員把總八

員經制外委一員馬步兵四百二十名每於換班時准其奏留二三員以備教導新換官兵惟陋習相沿多有班滿而猶告留防所紛紛外留則留防者愈積愈多而本營轉致無人操防所空之缺又須人署理亦不能得力況此等告留員并非弓馬生疎卽年力衰弱半係憚於考覈以告留爲規避地步自應飭令照例回營詳加考驗如人才技藝可觀卽飭任事其年衰技庸之弁亦可隨時分別降革應請嗣後凡遇奏保之弁一經得缺卽飭回營不許久駐防所卽或不得已必須奏留熟手以

備教導新換之兵止准留一二人亦不得過兩班  
庶幾兩不相妨可資操防而重職守等情請

奏前來並將班滿告留得缺弁兵咨會定邊將軍暨  
科布多叅贊大臣飭令回營歸伍謹

奏奉

硃批知道了

道光九年九月二十八日

奏爲換防弁兵任意告留明定限制請

旨飭遵以重營伍事竊

臣

准兵部咨開定邊將軍咨報

烏里雅蘇台科布多二處駐防官兵明歲五年期

滿應行更換官十二員內告留五員應換兵四百  
名內告留三百七十三員毋庸派換其餘應換官  
七員兵二十七名行令照數出派至把總魏宗湯  
等八弁暫留該處教導新換官兵咨會查照辦理  
等因查道光七年七月間臣因烏里雅蘇台科布  
多二處換防弁兵告留人數較多此等告留員弁  
非弓馬生疎卽年力衰弱半係憚於考覈藉詞告  
留爲規避地步是以

奏明嗣後奏保之弁一經得缺卽飭回營不許久駐  
防所卽或必須熟手以備教導新換之兵止准留

一二人亦不得過兩班奏奉

硃批知道了欽此本年二月間定邊將軍彥德以烏里雅蘇台科布多二處差使較多祇保留一二人不敷差委奏奉

諭旨准其於年滿已得實缺之把總外委內每項酌留三四人候續有熟悉之員卽飭令回營當差欽此欽遵各在案茲屆換班之期彥德於應換千把等官十二員內咨留五員又於馬兵保陞把總外委十三員內咨留八員不特與臣前奏止准留一二人之處大相懸殊卽與該將軍奏奉



諭旨准於把總外委內每項酌留三四人之數亦復違  
逾定額甫經奏明欽奉

諭旨章程未便任其淆混且應換兵丁四百名告駐兵  
三百七十三名是告留已有十分之九更屬荒唐  
如謂差遣藉資熟手亦不必如此之多該兵丁若  
非年力衰頹規避考覈卽係別有營謀心存戀棧  
似此紛紛告留竟係常川駐守於內地營制殊有  
關係該將軍任意聽各兵告留實屬有心徇私不  
顧公事相應據實奏

聞請

旨勅下定邊將軍烏里雅蘇台科布多二處來年班滿

武弁欽遵

硃

諭旨於把總外委內每項酌留三四人不得逾額保留

不得過

所留之員亦不得過兩班至該將軍原奏內稱該處並無辦理文案經書向係挑選綠營兵丁銷算錢糧繕寫文移如果實有辦事之兵丁換班之時公事無人接辦亦應明定限制只准酌留十餘人以資辦公均不得過兩班以杜規避而實營伍謹

奏

道光九年十月初四日奉

上諭那彥成奏換防兵丁告留請明定限制以重營伍  
一摺烏里雅蘇台科布多二處換防弁兵前經那彥  
成奏准止留一二人嗣據彥德以差委不敷奏准酌  
留三四人茲據那彥成查明彥德於應換千總等官  
內咨留五員馬兵保陞把總外委人員內咨留八員  
兵丁四百名內咨留三百七十三名似此漫無限制  
於內地營務殊有關係嗣後該二處弁兵每屆班滿  
之期把總外委內每項酌留不得過三人兵丁不得  
過十人所留弁兵均不許過兩班以杜規避而嚴考  
覈該部知道

道光十年六月十一日

奏爲派辦換防官兵事竊照烏里雅蘇台科布多二處向於直隸山西二省派官十一員兵四百名前往駐防五年期滿更換嗣於乾隆四十六年經定邊將軍奏請裁減回營兵一百名又科布多辦事大臣奏請添留屯田把總一員兵二十名嘉慶四年定邊將軍又奏派烏里雅蘇台兵八十名於換班時一併派往共應派官十二員兵四百名內除山西省派官二員兵三十八名外直隸應派官十員兵三百六十二名所有上次派往官兵自道光

五年換防以來現屆五年期滿臣接准定邊將軍咨會因留駐防官兵較多當經

奏請刪減茲准該將軍等遵

旨酌留咨會行據布政使顏伯燾會同臣標中軍副將

海凌阿分別議詳前來臣查道光十年應行派往

北路軍營官兵除該處告留弁兵及應留山西省

大同鎮派往馬步兵二十四名外直隸實應派官

六員馬步匠藝等兵一百九十六名內應需叅遊

一員守備一員臣在於通省旗員內詳加揀選查

有喜峯路遊擊德珠布張家口協萬全營守備德

雲堪以派往其餘弁兵飭令宣化鎮循例酌派馬兵各帶本身營馬所需軍裝鍋帳等件於各營內撥給帶往應需裝載軍器火藥駝隻鞍屨等項俱照上屆之例覈明給發口外應需三個月口糧仍在於山西大同府分別支給裹帶其官兵跟役應需整裝鹽菜等銀均遵照乾隆四十三年欽奉

諭旨照舊賞給至官兵借項除官員遵

旨借俸一年外其養廉餉乾等銀亦按照節次換防成例酌量借給有減無浮仍分季覈扣還項一面檄飭口北道先於軍需項下動支給發事竣由藩司

覈明於司庫內撥還歸款並分咨戶兵二部謹

奏奉

硃批知道了

懇濟兵需

道光六年六月初二日

奏爲大名鎮標各營坐落被旱地方兵力支絀懇

恩酌借餉銀以資接濟事竊據大名鎮總兵薛陞稟報

大名地方現因被旱失收米薪昂貴兵丁所關餉

銀不敷用度請每馬兵借領倉穀四石步兵借領

三石守兵借領二石在於元城大名兩縣倉穀內

就近賞借支給以資餉口等情經臣飭司覈議茲

據布政使屠之申議覆分別酌借餉銀詳請具奏

前來臣查元城大名兩縣並無存貯常平倉穀僅



止倉存義穀三千數百石係百姓捐輸以備災荒  
不時之需現經碾米煮賑拯濟窮黎業已動用無  
可再借惟今夏大名被旱情形較上秋爲重該鎮  
弁兵按期操演專藉月餉當差且被旱之後兼有  
匪徒強借均糧輪流彈壓巡防均須食用值此米  
薪昂貴之時自應查照向例准其借支餉銀以資  
接濟第大名鎮所轄各營駐劄之元城大名南樂  
清豐開州東明長垣等七州縣均係被旱之區該  
鎮僅止稟請將大名左右城守三營酌借接濟而  
開州協及東明長垣杜勝等營未經議及細加體

察各該營被旱兵丁同一拮据未便稍涉偏枯合  
無仰懇

聖恩俯准將情形較重之大名左右城守並開州協等  
四營馬步守兵酌借一季餉銀八千四百二十八  
兩五錢情形稍次之東明長垣杜勝等二營馬步  
守兵酌借半季餉銀一千七百九十九兩二錢五  
分共銀一萬二百二十七兩七錢五分在於司庫  
節省馬乾項下借撥銀六千兩朋扣項下借撥銀  
四千二百二十七兩七錢五分照數分撥領回散  
給以資餬口所借銀兩查該處連年被旱糧價驟

難平減請自道光七年秋季扣起分作八季陸續歸款以紓兵丁而示體卹謹

奏

道光六年六月初五日奉

上諭那彥成奏大名鎮標各營坐落被旱地方兵力支絀懇借餉銀一摺本年直隸大名鎮標各營駐劄地方被旱糧價增昂兵力拮据該督請借支餉銀以資接濟著照所請加恩將情形較重之大名左右城守並開州協等四營馬步守兵借給一季餉銀八千四百二十八兩零情形稍次之東明長垣杜勝等三營

馬步守兵借給半季餉銀一千七百九十九兩零在  
於司庫節省馬乾項下借撥銀六千兩朋扣項下借  
撥銀四千二百二十七兩零照數分撥領回散給所  
借銀兩著自道光七年秋季扣起分作八季陸續歸  
款以示體卹該部知道

道光九年十二月十三日

奏爲寶直局鼓鑄錢文搭放兵餉現值錢價日賤兵  
力拮据恭摺奏懇

聖恩俯准暫行停鑄將兵餉改爲滿放銀兩以節運費  
而卹兵艱事竊照直隸寶直局每年額鑄制錢六

萬餘百串除支給匠役工食外尙剩制錢五萬五千餘串向爲保定天津二營四季搭放一成並各提鎮營冬季普律搭放一成兵餉之用每放制錢一串作爲銀一兩從前銀價在一千文以內各兵丁原可稍沾餘潤今則每銀一兩易制錢一千三百數十文搭放兵餉每銀一兩仍照例給制錢一千文覈之現在市價僅該銀七錢五分兵力未免苦累查每年鼓鑄制錢覈扣成本銀兩雖可溢餘制錢五千餘串第委員前赴蘇州採買洋銅又赴湖北採買黑白鉛舫往返年餘始得領運回直例

支運腳不敷又須在於通省州縣養廉內每年攤捐銀七千兩以資津貼若將捐貼之項併作成本計算卽有不敷如果錢貴於銀以之放餉與兵丁有益自當照常運鑄旣資

國用亦便兵民未可較論盈絀茲錢價日賤扣銀放錢卽與兵食有虧買銅運鉛又須官爲賠貼殊與公事輿情兩無所裨伏查乾隆五十九年因錢價過賤經前督臣梁肯堂

奏明暫行停爐至嘉慶元年復行開鑄現在情形似當倣照辦理應請將寶直局制錢自道光十年正

月爲始暫行停鑄並前因銅鉛不敷所鑄卯數不足者亦免補鑄該局現存銅鉛仍行貯庫同餘剩錢文一併造冊報部備數匠役人等分別裁撤俾令另謀生計江蘇湖北二省銅鉛暫停採辦各州縣所捐運費無庸攤派以歸節省各營來年春季兵餉業經照常支放並應自道光十年夏季爲始將兵餉改爲滿放銀兩仍不拘年限一俟市易銀價平減隨時

奏請開鑄據藩司顏伯燾具詳請奏前來謹

奏

道光九年十二月十六日奉

上諭那彥成奏請暫停鼓鑄錢文將兵餉改爲滿放銀兩一摺直隸寶直局鼓鑄錢文向係搭放兵餉一成每銀一兩照例給制錢一千文據該督查明現在錢價日賤扣銀放錢兵力未免拮据且委員買運銅鉛運腳不敷又須官爲賠貼請暫停鼓鑄將兵餉滿放銀兩以卹兵艱而節運費著照所請所有寶直局制錢自道光十年正月爲始暫行停鑄其前因銅鉛不敷所鑄卯數不足者亦免補鑄該局現存銅鉛著仍行存庫同餘剩錢文一併造冊報部備查匠役人等



分別裁撤各營來年春季兵餉業經照常支放著自  
道光十年夏季爲始改爲滿放銀兩仍不拘年限俟  
銀價平減隨時奏請開鑄至江蘇湖北二省銅鉛著  
暫停採辦各州縣所捐運費無庸攤派以歸節省該  
部知道

議設多倫諾爾廳學校

道光七年閏五月二十六日

奏爲口外風俗龐獷請設學校以資化導事竊照直隸口外多倫諾爾幅輿遼濶本係蒙古地方自康熙年間准內地民人前往墾種迄今百數十年生齒日繁漸臻富庶惟素鮮讀書之人民間不知禮義好勇鬪狠訟獄繁多甚至不顧倫紀雖經隨案懲創而風氣驟難挽回伏思

國家學校之設原以啟牖愚蒙令其深明義禮今該廳戶口殷繁早經編排保甲卽與土著無異聞其

中殷實之家亦知延師課子因例不准應試登進  
無階多致半途改業似應設立學校俾弦誦相聞  
庶幾薰陶善良可望移風易俗恭查乾隆年間欽  
奉

諭旨熱河地方富庶命建學宮設立庠額今多倫諾爾地  
方富庶與熱河情形大概相同應請援照熱河之  
例

奏請添建廳學以育人文而興教化至應設學額移  
駐教職直省州縣儘有額多人少之處可以抽撥  
簡僻州縣原設教職兩員亦可裁改該廳民尙殷

富應建

文廟學署責成該廳倡捐辦理毋庸另籌經費據藩司  
屠之中詳請具

奏前來臣覆查無異理合會同順天學政臣彭邦疇  
合詞奏

聞如蒙

俞允所須庠額暨補廩出貢及應添應裁一切各事宜  
容臣另行會議具

題謹

奏

道光七年六月初一日奉

上諭那彥成奏口外多倫諾爾請設學校一摺著禮部  
覈議具奏

容安謹按多倫諾爾學校經禮部議覆直隸多  
倫諾爾廳添設學校應令該處先行設立書院  
俟將來著有成效再行具奏辦理是年六月十  
三日奉

旨依議

籌備新疆兵差

道光六年八月十二日

奏爲請

台事竊查喀什噶爾逆回滋事現奉

諭旨派調東三省官兵馳往剿捕所有兵丁日需口糧

按例每名每日給銀五分嘉慶十八年剿辦滑縣

匪徒前督臣溫承惠因省南糧價昂貴

奏准每兵一名加銀一錢連例支口糧共給銀一錢

五分造報准銷在案本年直隸秋收雖好但兵行

之區一切食物不免較平日增昂兵丁均經嚴加

夏三  
卷一百一十一  
三  
約束平賣平買不准稍滋事端若照定例每名每日給銀五分實在不敷食用但仍照前次口糧一錢五分未免過多

臣與滿泉兩司再三斟酌合無

仰懇

聖恩俯准每兵酌加銀五分每日給予口糧銀一錢以示體恤至沿途應需車馬亦應預備除馬匹一項飭調營驛馬匹供應外所需車輛及芟草料豆并一切食物等項應向民間僱備採買查嘉慶十八年軍需案內經前署督

臣章煦

奏明車輛照時價僱備芟草料等項悉照時值買用

本年直隸秋收豐稔自未便援以爲例但按例價  
給發則過於短少實屬不敷或州縣藉以擾累閭  
里否亦藉資虧缺臣亦與兩司等悉心商酌此次  
僱用車輛及買備各物應按各處時價酌減十分  
之三四其車輛守候回空給予半價統俟事竣覈  
實報銷如此斟酌辦理

帑項既不致多糜而車戶舖民亦可不致派累謹  
奏奉

硃批所請可行只要周妥無悞

道光六年八月十五日奉



上諭那彥成奏兵行日需口糧等項請旨辦理一摺喀  
什噶爾逆回滋事前經降旨派調東三省官兵馳往  
剿辦所有兵丁日需口糧按例每名每日給銀五分  
不敷食用據該督奏若照嘉慶十八年剿辦滑縣匪  
徒成案每兵一名加銀一錢又未免過多本年直隸  
秋收豐稔物價較爲平減著照所請每名准加銀五  
分每日共給予口糧銀一錢以示體恤餘著該部速  
議具奏

道光六年八月二十一日

奏爲請

旨停運藥鉛火繩以節勞費而利兵行事竊照八月二十日准工部咨稱吉林黑龍江官兵應用藥鉛等項經兵部奏明共兵三千名計火藥一萬二千觔烘藥七百五十觔鉛子一萬一千二百五十觔裝成油簍約計二百五十個火繩一萬二千條裝成木箱四十餘個酌定每起由步軍統領衙門派都守一員千把外委三員兵丁五十名共兵二百名分作四起於本月二十一二三四等日接續起解至保定省城交替逐省更換每起需車十四輛亦逐站更替迅速遞交甘肅軍需局毋悞該兵丁等

到彼支領各等因當卽轉飭沿途驛站州縣預備車輛遵照遞運外查兵工二部議解藥鉛火繩並派弁兵護送自係照例辦理第自京城至甘肅口外相距萬里每起藥鉛需車十四輛共車五十六輛營弁十六員兵丁二百名沿途護送道路綿長所費實屬不貲况爲日過久火藥火繩雖裝盛得法若遇雨水浸淫勢必潮濕恐亦不堪應用現在兵行緊急沿途驛站差務殷繁運解此項藥鉛火繩數萬觔及護送官兵二百餘員名需用車馬不少驛站添此支應兼顧爲難轉恐有礙兵行未能

迅速因思甘省及口外各營藥鉛火繩甚爲充足  
總理糧餉大員自己通盤籌計此項軍火在嘉峪  
關哈密等處支給亦不爲遲相應請

旨將此項藥鉛火繩停止運解以省驛站勞費如果業  
已由京起運卽請隨處截留作爲直隸各營操演  
之用仍於每年應造藥鉛火繩扣除例價以歸實  
用抑臣更有請者此次吉林黑龍江官兵三千名  
需用車馬較多業經督飭藩臬兩司籌議章程飭  
令沿途驛站州縣寬爲預備隨到隨換住宿之處  
支搭帳房俾有棲止仍於相隔五六十里有驛之

處設立飯棚多備食物以資果腹欽遵現奉

諭旨飭委藩臬大員會督該管鎮將道府妥爲照料除  
另摺覆奏外惟念直省各官與吉林黑龍江官兵  
人面生疎該官兵等行走迅速到站早晚無定往  
往有任意多索車馬中途賣放更有謀利之徒冒  
混跟隨強行索用沿途增添愈添愈多地方官於  
倉猝之際無從分辨遂至濫支溢應以致後起官  
兵車輛轉形缺乏嘉慶十八年直省支應車馬卽  
有此弊幾致貽悞兵行應請

旨飭下領隊大臣將每站應用車馬按照兵牌勘合確

數開明揀派明練公正章京二員先期至站會同  
地方官按照兵牌勘合將車馬逐一點驗俟官兵  
到時眼同更換支放在地方官既不敢稍有短少  
官兵不至格外多索而冒混隨行等弊亦可不禁  
自無矣謹

奏

道光六年八月二十一日

奏

臣接准兵部咨開欽奉

上諭此次派調吉林黑龍江勁旅前赴回疆軍營協剿  
經由直隸河南陝西甘肅等處著各督撫派委藩臬

大員會同該管鎮將道府妥爲照料催趲過行毋稍  
遲緩該領隊大員沿途彈壓官兵務須紀律嚴明秋  
毫無犯倘有騷擾不法著該督撫據實叅奏將犯事  
官兵按軍法治罪並將約束不嚴之領隊官員嚴懲  
不貸欽此查此次吉林黑龍江勁旅前赴回疆協勦  
經由直隸地方所需車馬臣已飭藩臬兩司轉飭  
催覓派調安設供應其飯食等項亦飭經由州縣  
預爲備辦派委文武員弁照料稽查前項官兵自  
進山海關起至河南安陽縣豐樂鎮交卸止經由  
直隸二十一州縣臣先已飭委司道大員業經前

赴差所照料妥辦所有山海關至永平府委該府  
王開雲永平府至京委護通永道徐寅第良鄉至  
保定委霸昌道惠豐保定至栢鄉縣委臬司戴宗  
沅清河道陶樸栢鄉縣至河南安陽縣豐樂鎮委  
大名道李德立各前往彈壓護送并令該管府廳  
直隸州各按交界接替務令催趲迅速遄行不使  
稍有延緩倘兵丁等有滋事不法臣必據實叅奏  
從嚴辦理斷不稍有姑容以仰副

皇上整肅兵行之至意謹

奏奉



硃批知道了

道光六年八月二十四日軍機大臣字寄奉

上諭那彥成奏請停運藥鉛火繩籌議兵行供應一摺  
此次吉林黑龍江官兵三千名前赴回疆軍營協勦  
所需藥鉛火繩由京分起解送各省派委員弁交替  
轉運茲據該督奏稱自京至甘相距道路綿長逐站  
更換車輛供應較難且長途遇雨受潮恐亦不堪應  
用前據鄂山奏明火藥鉛丸火繩現已飭局多爲製  
辦甘省籌備充裕足敷調用著將前項應解藥鉛火  
繩未經起運者留於京中各營配用其已由京起運

者隨處截留作爲直隸各營操演之用卽於每年應造藥鉛火繩例價內扣除其如何分營存貯之處先行報部備查至該官兵需用車馬供頓業據飭令沿途驛站州縣妥爲籌備惟該官兵到站早晚無定往往任意多索車馬中途賣放更有冒混跟隨逞強索取地方官倉猝莫辨濫支濫應必當嚴行查禁著各該領隊大臣將每站應用車馬按照兵牌勘合開明確數派明練公正章京二員先期到站會同地方官按照兵牌勘合逐一點驗俟官兵到時眼同更換文放又另片奏派委司道大員分段照料妥辦著照所

請飭各前往彈壓並令該管府廳州各按交界接替  
催趨迅速進行不使稍有延緩該兵丁等如有滋事  
不法卽據實嚴叅懲辦該部知道

道光六年九月十七日

奏臣於本年九月十五日接准軍機大臣字寄道光  
六年九月十四日奉

上諭現在揚威將軍長齡與叅贊楊遇春不日可抵阿  
克蘇各站官兵多未出關應令迅速馳赴軍營以備  
及時進剿所有吉林黑龍江兵丁經過直隸河南陝  
西甘肅及哈密至阿克蘇一帶著該督撫大臣並各

飭所屬於應需車馬供支速爲備辦催令遄行毋致稍有遲滯欽此查山海關爲吉林黑龍江兵丁入直隸首站至磁州出直隸境相距一千七百餘里凡兵丁經過地方臣早行嚴飭各州縣將應需車馬供支妥爲籌備隨到隨行俾兵丁迅速前進並因驛站係臬司專政當卽派委該司及各道各府分段照料催督近日兩三起兵丁連夜行走均爲迅速嗣據各州縣稟報各兵丁進關二千五百名出直隸境七百五十名過保定省城一千六百名於尖宿處所毫無滋事停留行程極爲妥速誠如

聖諭早到一日卽可得一日之用謹遵奉

諭旨再行嚴飭各地方官照料兵丁趕緊行走謹

奏奉

硃批妥爲催趲

道光六年十月初七日

奏此次奉

旨派往新疆軍營進剿之吉林黑龍江兵丁前後共三

千名先經臣恭摺具奏

飭令領兵各大員預期派委明白妥當章京二員先行

至站執持車馬數目勘合清單一面由臣派委文

武將車馬備足數目俟所派章京等一到當面點  
清交代仍嚴飭經過各州縣將應需飯食供支寬  
爲籌備又遵奉前降

諭旨派臬司各道以及府廳文武分段照料隨到隨  
行毋許稍有延悞嗣於九月十四日續奉

諭旨催令進行又經轉飭沿途印委各員一體欽遵催  
督奏

聞在案茲查前項兵丁三千名已於十月初二日全過  
保定省城計初六七日末起可過磁州入河南安  
陽縣之豐樂鎮交豫省委員接替全數出直隸省

境該官兵等經過地方以及尖宿處所自始至終均極安靜逐日行程亦皆遵

旨迅速毫無擾累且極歡忻士飽馬騰已見氣吞敵愾

謹

奏奉

硃批知道了

道光七年二月初四日

奏爲京營及吉林黑龍江官兵過境所有供支等項

隨案據實報銷以杜弊混恭懇

聖恩飭部先行覈覆事竊查直隸歷次辦理過境兵差

支用廩糧車價麩草料豆銀兩均俟凱撤回兵差竣始行併案造冊報銷歷前等後承辦州縣多有更換抵入交代案內已屬牽混不清且後任代爲造報既非經手原人往返移查經久不結宕延日久難免不滋弊混上年秋間承辦京營及吉林黑龍江徵兵過境自臨榆縣入直隸境起至磁州交河南界止經由三十二州縣支應均無貽誤當將用過銀兩分飭各州縣據實按款造冊報銷並隨即飭查各屬並無藉辦兵差通挪虧空山道府加結具報此次共用廩糧車價麩草料豆等項銀五



萬三千餘兩兵行迅速勢難自行買食旅店無多  
不敷兵丁住宿沿途州縣搭蓋棚廠備給茶水飯  
食並津貼麩草料豆等項例價不敷共用銀三萬  
四千餘兩均照直省歷次兵差成案由文職大小  
各官分攤養廉歸補此次應查照辦理所有例准  
報銷銀五萬三千六百二十八兩零既據各屬造  
報齊全按例稽覈尙無浮冒自應先行分別咨部  
題銷以清眉目而免宕延除凱旋兵差過境另行結  
算照例報銷外茲據藩司屠之申臬司戴宗沅清  
河道陶樾會詳請

奏前來合無仰懇

天恩俯准將前項例准報銷銀兩飭部先行覈覆施行

謹

奏奉

硃批戶部議奏

道光十年九月十五日

奏爲直隸磁州等處震災之後民氣未復進征吉林

黑龍江官兵請由晉省行走事竊

臣

承准軍機大

臣字寄道光十年九月十三日奉

上諭前因楊遇春等奏喀什噶爾有逆回入卡滋事已

先後降旨調派吉林黑龍江及四川陝西甘肅等處官兵前往堵剿經過各該地方著該督撫等派委藩臬大員會同該管鎮將道府妥爲照料催趲過行毋令沿途騷擾逗留至該兵所需車馬等項該地方官往往藉端苛派吏胥等卽從中舞弊苦累閭閻不可不認真查禁此次各路官兵過境著該督撫等嚴飭所屬查照成案妥速辦理毋得稍有遲悞如有勒派擾累情弊卽著據實嚴叅倘有心徇隱別經發覺或被入控告除將辦理不善之地方官重懲外並將該督撫等懲處不貸將此各諭令知之欽此當卽轉飭

藩臬兩司並該管鎮將道府欽遵辦理去後伏查  
自京至甘肅馳驛官站向例由直隸山西陝西等  
省行走道光六年奉

旨派調京兵及吉林黑龍江官兵進剿接准部咨行令  
由直隸河南陝西前進維時遵照供億均由直隸  
之磁州出境入河南安陽縣境交替本年五月間  
磁州成安邯鄲三州縣猝被震災磁州情形尤重  
小民元氣未復而磁州邯鄲爲取道豫省必由之  
地卽接壤之河南彰德安陽等地方亦同時被災  
情形相似今民間尙未復業兵丁住宿店房尙少

無可棲止之處倘兵丁野處亦恐有搶奪等事臣  
與司道悉心籌畫應由直隸之井陘縣出境入山  
西平定州境直送潼關本係馳驛官站並非繞行  
而直隸兩省被災州縣得以免辦兵差於災區大  
有裨益據司道會詳前來臣覆覈無異合無仰懇  
皇上天恩俯准此次進征官兵均由山西行走如蒙  
俞允請

旨飭下山西撫

臣

飭屬妥爲預備以免臨時貽悞至直

隸承辦兵差州縣

臣

已嚴飭該管道府廳州認真

查辦如有不肖州縣藉端苛歛擾累民間立即據

實揭叅臣與藩臬兩司仍隨時派員密查暗訪有  
犯必懲不敢稍存姑息總期經理妥協使兵行迅  
速安靜地方無絲毫擾累以仰副

聖主尊尊教誡之至意謹

奏

道光十年九月十八日奉

上諭上屆派調京兵及吉林黑龍江官兵進剿均降旨  
令由直隸河南陝西前進茲據那彥成奏應行經由  
之直隸磁州等處地震以後災區元氣未復恐兵丁  
無可棲止河南安陽等處情形相同所有此次進征

官兵俱著由直隸井陘縣入山西平定州前往潼關  
一帶行走各該督撫卽飭屬妥爲預備毋致臨時貽  
悞

道光十年十一月十五日

奏此次回疆軍營協勦之京營官兵一百九十五員  
名吉林兵一千名黑龍江兵一千名經

臣

奏明由直隸井陘縣入山西平定州境一帶行走一  
面查照上次章程先期飭令經過各州縣將應需  
車馬飯食等項寬爲預備並遵

旨派委藩臬大員會督該管鎮將道府妥爲辦理仍分

段派委文武員弁接站照料隨到隨行不使稍有  
停滯茲查前項官兵間日分起行走於十月初三  
日入境已於十一月初九日全數出直隸井陘縣  
境車馬飯食均屬周備至山西平定州交晉省委  
員接護前進該官兵等經過地方以及尖宿處所  
均甚安靜亦無參差耽延逐日行程遵

旨極為迅速毫無擾累謹

奏奉

硃批知道了

道光十一年正月二十五日



奏此次派往回疆之京營及吉林黑龍江等處官兵  
二千餘員名欽奉

諭旨凱撤回營經臣查照進征章程先期飭令經過各  
州縣將應需車馬飯食等項寬爲預備一面飭令  
藩臬會同該管鎮將道府妥爲辦理並委文武員  
弁分段按站照料隨到隨行不使稍有停滯茲查  
黑龍江頭起官兵已於正月二十日入井陘縣境  
已咨奉天府尹飭屬備辦並俟前項官兵全數出  
境再行奏報謹

奏奉

硃批知道了

那文毅公二任直隸總督奏議卷六十八